



REPUBLIKA E SHQIPËRISË

BASHKIA VLORË
DREJTORIA JURIDIKE

Nr. 2603 prot.

Vlorë, më 20 . 02 2024

PROJEKT-VENDIM

Nr. _____, Datë, _____ 2024

**“PËR KRIJIMIN E SHOQËRISË “MARKATA E PESHKUT VLORË” SH.A SI
PERSON JURIDIK NË PRONËSI TË BASHKISË VLORË DHE MIRATIMIT
TE STATUTIT”**

Bazuar në Ligjin Nr.139/2015 “Për Vetëqeverisjen Vendore”, neni 8, pika 2, neni 9/1, pika 1/b dhe 7/a, Neni 54, pika m, në Ligjin nr. 9901, datë 14.04.2008 “Për Tregtarët dhe Shoqëritë Tregtare”, i ndryshuar, në VKM Nr.347 datë 22.05.2019 “Për përcaktimin e kushteve dhe të procedurave të transferimit të menaxhimit të infrastrukturës së peshkimit tek organizatat e peshkimit, njësitë e vetëqeverisjes vendore dhe subjektet private”, Në Urdhërin e Përbashkët Nr.443, datë 06.10.2022 “Për përcaktimin e tarifave të autorizimit për peshkimin çlodhës-argëtues dhe tarifave për shërbimet që ofrohen nga organizatat e peshkimit” si edhe në relacionin e paraqitur nga administrata e Bashkisë Vlorë”

VENDOSI:

- 1) Krijimin e shoqërisë me emërtimin tregtar “MARKATA E PESHKUT VLORË” sh.a, shoqëri aksionere, e zotëruar në masën 100 (njëqind) % të kapitalit të shoqërisë nga Bashkia Vlorë me objekt veprimtarie, ofrimin e shërbimeve në fushën e zhvillimit ekonomik. Menaxhimin në përputhje me legjislacionin në fuqi për peshkimin në zonën e Markatës si dhe sigurimin e një mekanizmi për pjesëmarrjen në bashkëmenaxhimin e burimeve peshkore.
- 2) Shoqëria “MARKATA E PESHKUT VLORË” sh.a themelohet, organizohet dhe funksionon si shoqëri sh.a, në përputhje me parashikimet e ligjit Nr.9901, datë 14.04.2008 “Për tregtarët dhe shoqëritë tregtare”, i ndryshuar.
- 3) Kapitali fillestar për krijimin e shoqërisë “MARKATA E PESHKUT VLORË ” sh.a, të jetë 3.500.000 lekë.
- 4) Bashkia Vlorë është ortaku i vetëm themelues, i cili zotëron 100 (njëqind) % të kapitalit themeltar të shoqërisë “MARKATA E PESHKUT VLORË” sh.a. të barabartë me një kuotë me vlerë të përgjithshme prej 3.500.000 lekë.
- 5) Shoqëria “MARKATA E PESHKUT VLORË” Sh.a, fillimisht të ketë selinë qendrore në adresën, Triport-Vlorë, Shqipëri.

- 6) Shoqëria “MARKATA E PESHKUT VLORË” sh.a. të zhvillojë aktivitetin e saj për një afat kohor të pacaktuar.
- 7) Pas miratimit të kërkesës për themelimin e shoqërisë aksionare themeluesi cakton Administratorin/Administratorët për herë të parë.
- 8) Efektet financiare për zbatimin e këtij vendimi, për krijimin e kapitalit fillestar të shoqërisë, në vlerën 3.500.000 lekë, përballohen nga buxheti i vitit 2024.
- 9) Bashkia Vlorë, Drejtoria e Financës, Buxhetit dhe Kontabilitetit angazhohet në mbajtjen dhe plotësimin e dokumentacionit.
- 10) Bashkia Vlorë, nga data e hyrjes në fuqi të këtij vendimi, ndjek procedurat e nevojshme për regjistrimin e shoqërisë “MARKATA E PESHKUT VLORË”, sh.a. në Qendrën Kombëtare të Biznesit.
- 11) Të autorizojë Kryetarin e Bashkisë ose personin e deleguar prej tij, që të përfaqësojë Bashkinë Vlorë, në cilësinë e aksionarit të vetëm për kryerjen e të gjitha veprimeve të nevojshme për përgatitjen dhe nënshkrimin e akteve të themelimit të shoqërisë së re dhe regjistrimin e saj sipas legjislacionit në fuqi.
- 12) Bashkia Vlorë i siguron shoqërisë “MARKATA E PESHKUT VLORË” sh.a, nga inventari i saj i pronave të paluajtshme apo ambiente të tjera të kontraktura ndaj të tretëve, mjediset e nevojshme për fillimin e ushtrimit të veprimtarisë sipas objektit të saj.
- 13) Për zbatimin e këtij vendimi ngarkohet Kryetari i Bashkisë Vlorë.
- 14) Ky Projekt - Vendim hyn në fuqi menjëherë.

Konceptoi: A. Tushi

Miratoi: D. Demiri

KRYETAR

Ermal Dredha





REPUBLIKA E SHQIPËRISË

BASHKIA VLORE
DREJTORIA JURIDIKE

Nr. 2603 prot.

Vlorë, më 20.01 2024

RELACION

Mbi Projekt-Vendimin “PËR KRIJIMIN E SHOQËRISË “MARKATA E PESHKUT VLORE” SH.A SI PERSON JURIDIK NË PRONËSI TË BASHKISË VLORE DHE MIRATIMIN E STATUTIT”

PARA KËSHILLIT TË BASHKISË

Të nderuar Këshilltarë!

Projekt -Vendimi që ju paraqesim për miratim **PËR KRIJIMIN E SHOQËRISË “MARKATA E PESHKUT VLORE” SH.P.K SI PERSON JURIDIK NË PRONËSI TË BASHKISË VLORE DHE MIRATIMIN E STATUTIT**”, vjen si synim i Bashkisë Vlorë të krijojë një mjedis të rregullt të tregut të peshkimit me shumicë, duke e formalizuar dhe ruajtur konkurrencën midis subjekteve tregtare.

“Markata e Peshkut Vlore” sh.a do t’a ushtrojë aktivitetin e saj në një objekt dy katësh i ndërtuar së fundmi dhe ka një sipërfaqe prej 1340 m², në të cilën përfshihen hapësira të hapura për zhvillimin e ankandave, 15 dhoma frigoriferike, zyra administrate, zyra për subjektet, garderoba dhe ambiente sanitare, ambiente shërbimi (restorante, bar – kafe). Sheshi i ankandit do të shërbejë për kryerjen e të gjitha veprimeve të shit-blerjeve nga operatorët ekonomikë.

Ngritja e Markatës së Peshku Vlorë sh.a ka si objektiva kryesore:

- vënien në funksionim dhe menaxhimin e infrastrukturës së peshkimit të Vlorës,
- krijimin e një bashkëpunimi të strukturuar midis peshkatarëve dhe tregtarëve me shumicë
- krijimin e nje marrëdhënie aktive ndëpërmjet peshkatarëve, tregëtarëve dhe qeverisë lokale
- organizimin e bizneseve formale që i mundëson peshkatarëve të tregëtojnë produktet e tyre
- mundësimi i rritjes së kapaciteteve prodhuese

“Markata e Peshkut Vlorë” sh.a do të marrë përsipër përballimin e të gjitha kostove të përdorimit dhe të mirëmbajtjes, përfshirë edhe taksat e aplikueshme nga legjislacioni në fuqi si edhe të përgjigjet për mirëmbajtjen e markatës së peshkut, ku përfshihen mirëmbajtja e ndërtesave të administratës dhe reparteve ndihmëse, shërbimet e mbledhjes së mbeturinave të lëngëta dhe solide në territorin e markatës, mirëmbajtja e infrastrukturës për furnizim me energji elektrike, karburante dhe ujë të pijshëm. Gjithashtu do të ofrojë peshkatarëve ambiente për grumbullimin, seleksionimin, paketimin, dhe tregtimin e produkteve të detit duke ruajtur standard të larta cilësie.

Disa nga përparësitë e kësaj shoqërie janë si në aspektin e zgjedhjes së stafit të kualifikuar administrative dhe teknik, me specialistë me përvojë të lartë, në fushën përkatëse dhe duke siguruar mundësi të larta punësimi për të rinjtë si edhe funksionimi i saj në bazë të pajisjeve të një teknologjie të lartë moderne të prodhuara nga kompani të njohura në tregun e pajisjeve elektrike, të cilat ofrojnë efikasitet të lartë dhe kosto të reduktuar. Kompania gjithashtu do trajtojë personelin e saj për të ritur nivelin e shërbimit dhe mirëmbajtjes së markatës së peshkimit.

Në markatë do të jenë të montuara pajisje dhe makineri të teknologjisë moderne. Gjithashtu kompania ka si fokus kanalizimin e grumbullimin në treg të produkteve të detit, të dhëna për sasinë dhe cmimet e shitjes së produkteve të kontraktuara duke shmangur kështu informalitetin. Krijimi i kësaj Markate do të përbëjë një treg të rëndësishëm për qytetin e Vlorës.

Ndaj kemi propozuar që Markata ti jepet për menaxhim kompanisë “Markata e Peshkut Vlorë” sh.a me qëllim administrimin në mënyrë racionale, duke zbatuar legjislacionin në fuqi për të nxitur mbrojtjen e mjedisit dhe një zhvillim të qëndrueshëm për sigurinë ushqimore dhe peshkimin e ligjshëm duke respektuar rregullat dhe rregulloret e hartuara për këtë qëllim.

Përsa i përket strukturës financiare të modelit të “Markata Vlorë” sh.a aktualisht është fleksibël. Me ngritjen e strukturave rregulluese të markatës, shoqëria do të shmang dhe evitojë informalitetin dhe si rrjedhojë arin të bëhet e vetëfinancuar me shërbimet, të cilat do tu ofrojë bizneseve kundrejt një tarife mujore. Madje, parashikohet që “Markata e Peshkut Vlorë” sh.a (me pronarë të vetëm Bashkinë Vlorë) të gjenerojë të ardhura të cilat do ti përdorë për investim në ambientet e markatës, ambientet përreth, që këto ambiente të përshtaten sa më mirë në funksion të peshkatarëve.

Disa nga tarifat që kanë si qëllim mbulimin e shërbimeve që do të ofrohen në markatë janë:

- Tarifë për blerësit.
- Tarifë për shërbim ankand.
- Tarifë për përdorimin e mjediseve të përbashkëta, pajisjeve të markatës, pastrimit, akullit për prodhuesit (shitësit) e llogaritur lek/arke peshku.
- Tarifë për shërbimin e proces ngarkim-shkarkimit.
- Tarifa për tregtarët për hyrjen në market (biletë- hyrje).

Nëse do ti referohemi të ardhurave të “Markata e Peshkut Vlorë” sh.a, konsistojnë kryesisht në qiradhënien e ambienteve me qira.

Të ardhurat do të gjenerohen nga këto mënyra:

1. Qira të dhomave frigoriferike dhe ambienteve të zyrave
2. Qira të mjedisit bar-restorant
3. Qira për mjediset e pagesave on-line për operator banakra
4. Ofrimi i stendave dhe vendeve për të tregtuar produktet peshkore
5. Shitja e akullit për operatorët (ose dhënia me qira e dhomës frigoriferike të prodhimit të akullit).

Ndërsa, shpenzimet janë të kategorizuara në shpenzime administrative dhe operationale. Gjithashtu është përfshirë dhe përlogaritur që çdo vit të alkohen 3% e të ardhurave në një llogari rezerve.

-Shpenzimet Administrative konsistojnë në pagat, sigurimet shoqërore dhe shëndetësore të punonjëse, dieta, pajisje zyre dhe komunikimi.

-Shpenzime Operative përbejnë energjinë elektrike, ujin e pijshëm dhe mirëmbajtjen e territorit.

-Shpenzimet për energji elektrike, etj të mjediseve të dhëna me qira janë në ngarkim të qiramarrësit.

Në këto kushte, kërkojmë prej jush miratimin e këtij Projekt-Vendimi duke shpresuar në një vendimmarje pozitive në shërbim të komunitetit si edhe duke eliminuar konkurrencën e pandershme.

Duke ju falenderuar për bashkëpunimin!

Konceptoi: *A. Tushi*

Miratoi: *D. Demiri*

KRYETAR

Ermal Dredha



Nr. 2609/1 Prot

Dt. 21.02.2024

**STATUT I SHOQËRISË
"MARKATA E PESHKUT" SH. A, VLORË**

Sot më datë, 15.02.2024, mbështetur ne legjislacionin shqiptar ne përgjithesi dhe ne veçanti në ligjin 9901, datë 14.04.2008, " Per tregtarët dhe shoqëritë tregtare ", i ndryshuar, dhe ne Ligjin Nr. 9723 "Për Regjistrimin e Biznesit", i ndryshuar, hartoj statutin e përditësuar te shoqërisë Markata e Peshkut,

KREU I

Themelimi , Emri, Objekti, Kohëzgjatja, Selia

Neni 1

Krijimi

Shoqëria "Markata e Peshkut", sh.a, Vlorë themelohet si person juridik i te drejtës shqiptare.

Neni 2

Personaliteti juridik

Shoqëria fiton personalitetin juridik pasi të jetë regjistruar në QKB, në përputhje me kushtet dhe procedurat e parashikuara me ligj.

Shoqëria Markata e Peshkimit Sh.a, është një shoqëri tregtare, e themeluar nga Bashkia Vlorë.

Neni 3

Selia

1. Shoqëria e ka selinë në Tri Port Vlorë
2. Adresa e shoqërisë për qëllime komunikimi elektronik është: markatapeshkutvlor@gmail.com

Neni 4

Objekti i veprimtarisë

Kjo shoqëri do të ushtroje aktivitetin e saj në:

1. Menaxhimin në përputhje me legjislacionin në fuqi për peshkimin zonën e Markatës së Peshkimit në të cilën ka selinë e tij si edhe të sigurojë një mekanizëm për pjesëmarrjen në bashkëmenaxhimin e burimeve peshkore, sic parashikohet në ligj.

Neni 5

Të drejtat e shoqërisë

Shoqëria “Markata e Peshkut”, sh.a nuk përgjigjet për detyrimet që rrejdhin nga veprimtaria ekonomiko-tregtare, apo industriale që ortakët zhvillojnë në mënyrë të pavarur prej saj.

Shoqëria mund të ndryshojë emrin, selinë , kohëzgjatjen, objektin e veprimtarisë, administratorin sipas vendimeve sipas vendimeve që do marrin aksionerët.

Neni 6

Detyrat e shoqërisë

1. Respektojnë ligjet në fuqi, legjislacionin dhe direktivave mjedisore për peshkimin;
2. Respektojnë legjislacionin për përdorimin e ambienteve publike;
3. Respektojnë rregullat e mbrojtjes mjedisore të përshtatura nga autroitetet planifikuese;
4. Respektojnë kërkesat për higjenën sanitare dhe sigurisë ushqimore.

Neni 7

Kohëzgjatja

Shoqëria do të zhvillojë aktivitetin e tij për një periudhë kohore : Pa afat.

KREU II

KAPITALI

Neni 8 Kapitali themeltar

Kapitali themeltar i shoqërisë është 3.500.000 mijë lekë.

Kapitali i mësipërm është nënshkruar nga “aksionari i vetëm “ i shoqërisë : Bashkia Vlorë.

Markata , zoterues i kapitalit 3.500.000 Lekë, që përbën 100 % të kapitalit themeltar të shoqërisë.

Kapitali aksionar është i përbërë nga 1.000 mijë aksione, me vlerë nominale 3.500 lekë për aksion.

Neni 9 Kërkesa për të paguar aksionet

Administratorët mund t'u kërkojnë aksionarëve pagimin e kontributeve të pashlyera në lidhje me aksionet e tyre dhe çdo aksionar. Njoftimi për pagesë mund të parashikojë shlyerjen me këste të kontributeve të papaguara. Personi të cilit i drejtohet njoftimi për pagesën e kontributit do të jetë përgjegjës për njoftimet që i drejtohen atij pavarësisht kalimit të mëposhëm të pronësisë së aksioneve me të cilat lidhet njoftimi për pagesë.

Neni 10 Llojet dhe kategoritë e aksioneve

Aksionet mund të jenë të zakonshme ose aksione me përparësi. Aksionet e zakonshme u japin zotëruesve të tyre tagër për të ushtruar në Asamblenë e Përgjithshme të drejtat e aksionarit dhe për të përfituar pjesë të fitimeve dhe të shpërndarjes së pasurive të mbetura pas likuidimit, në raport me pjesën e kapitalit që aksionet e tyre përfaqësojnë.

Aksionet me përparësi u japin zotëruesve të tyre tagrin që nga ndarja e dividendëve të vendosur nga asambleja e përgjithshme të përfitojnë një shumë të caktuar ose një përqindje të caktuar të vlerës nominale të aksioneve të tyre, përpara shpërndarjes së fitimeve, në favor të aksionarëve të zakonshëm, përparësi në ndarjen e pasurive të shoqërisë, të mbetura pas likuidimit dhe të drejta të tjera të përcaktuara me ligj apo në statut. Aksionet, që japin të njëjtat të drejta, përbëjnë aksione të së njëjtës kategori (aksione të zakonshme, aksione me përparësi, aksione me të drejtë vote dhe aksione pa të drejtë vote).

Neni 11

Rregjistri i aksioneve

Shoqëria aksionare mban një regjistër të posaçëm, ku regjistrohen të dhënat e zotëruesve të aksioneve të shoqërisë, si: emri e mbiemri i aksionarit, apo emri i regjistruar, nëse është person juridik, vlera nominale e aksionit, adresa e banimit apo zyra qendrore e aksionarit dhe data e kryerjes së regjistrimit. Administratorët janë përgjegjës për mbajtjen e regjistrit të aksioneve të shoqërisë e detyrohen të lejojnë aksesin në informacionet e regjistrit ndaj çdo aksionari apo çdo personi tjetër që e kërkon. Informacioni i regjistrit të aksioneve duhet të publikohet në faqen e shoqërisë në internet. Shoqëria mund të lejojë regjistrimin *on-line* të të dhënave, që duhen regjistruar sipas pikës 1 të këtij neni.

Neni 12

Zmadhimi i kapitalit

Kapitali i regjistruar i shoqërisë mund të zmadhohet duke emetuar aksione rishtazi, kundrejt kontributeve të reja.

Kur emetohen aksione të reja, këto aksione i'u ofrohen aksionarëve ekzistues përpara se t'u ofrohen aksionarëve të tjerë të rinj, në pajtim me nenin 174 të Ligjit. Aksionet e reja i'u ofrohen aksionarëve sipas numrit të aksioneve që zotërojnë përpara ofertës. Oferta që i'u bëhet aksionarëve ekzistues duhet të pranohet brenda 20 ditësh pas publikimit në QKR. Asambleja e përgjithshme mund të vendosë që zmadhimi i kapitalit të kryhet me emetim të aksioneve të reja, për t'u nënshkruar vetëm nga aksionarët ekzistues.

Zmadhimi i kufizuar i kapitalit mund të kryhet vetëm me miratimin unanim të të gjithë aksionarëve.

Zmadhimi i kapitalit me aktivet e shoqërisë. Pas miratimit të bilancit të vitit paraardhës, asambleja e përgjithshme mund të vendosë ta zmadhojë kapitalin e regjistruar, duke kaluar në kapitalin bazë rezervat e disponueshme dhe fitimet e pashpërndara.

Neni 13

Zvogëlimi i aksoinit

Kapitali i regjistruar i shoqërisë mund të zvogëlohet me vendim të Asamblesë së Përgjithshme, në përputhje me përcaktimet e pikës 1 të nenit 145 të ligjit 9901.

Nëse zvogëlimi ndryshon të drejtat e një kategorie të caktuar aksionesh, vlefshmëria e tij kushtëzohet nga pëlqimi i aksionarëve përkatës, i cili duhet të përmbushë kërkesat formale të pikës 3 të nenit 149 të këtij ligji.

Zvogëlimi i kapitalit realizohet nëpërmjet zvogëlimit të vlerës nominale të aksioneve dhe anulim aksionesh.

Kapitali i regjistruar mund të zvogëlohet nën vlerat minimale, të parashikuara në ligj, vetëm në rastin kur zvogëlimi shoqërohet me një zmadhim të njëkohshëm të kapitalit

Neni 14

Mënyrat e fitimit dhe kalimit të aksioneve

1. Aksionet e një shoqërie aksionare dhe të drejtat, që rrjedhin prej tyre, mund të fitohen apo kalohen nëpërmjet:

- a) kontributit në kapitalin e shoqërisë, në çastin e formimit të shoqërisë;
- b) shitblerjes;
- c) trashëgimisë;
- ç) dhurimit;
- d) çdo mënyre tjetër të parashikuar me ligj.

2. Aksionet e të drejtat e fituara si më sipër nuk mund të ushtrohen ndaj asnjë personi

apo ndaj shoqërisë, përpara se veprimi të jetë regjistruar në regjistrin e posaçëm të aksioneve, që mban shoqëria, në përputhje me pikën 1 të nenit 119 të këtij ligji.

KREU III

Neni 15

ORGANET VENDIMMARRËSE DHE DREJTUESE

Organet e shoqërisë;

-Asambleja e përgjithshme;

-Këshilli mbikqyres

-Administrator

Emerimi/shkarkimi i administratorit bëhet nga Këshilli Mbikqyrës

Neni 16

Organi Vendimarrës

Asambleja e Përgjithshme është organi i vetëm vendimarrës i shoqërisë.

Asambleja është organi i vetëm vendimarrës i shoqërisë që miraton çdo ndryshim të statutit sipas modaliteteve të percaktuara në ligj.

Asambleja e Përgjithshme është përgjegjëse për marrjen e vendimeve për shoqërinë për çështjet e mëposhtme:

1. Përcaktimin e politikave tregtare të shoqërisë
2. Ndryshimet e statutit;
3. Emërimin e shkarkimin e administratorëve
4. Emërimin dhe shkarkimin e likuiduesve dhe të ekspertëve kontabël të autorizuar;
5. Përcaktimin e shpërblimeve për personat e përmendur në shkronjat “c” dhe ç” të kësaj pike
6. Mbikëqyrjen e zbatimit të politikave tregtare dhe administratorët, përfshirë përgatitjen e pasqyrave financiare vjetore dhe të raporteve të ecurisë së veprimtarisë
7. Miratimin e pasqyrave financiare vjetore dhe të raporteve të ecurisë së veprimtarisë
8. Zmadhimin ose zvogëlimin e kapitalit të regjistruar;

9. Pjesëtimin e aksioneve dhe anulimin e tyre;
10. Ndryshime në të drejtat, që lidhen me aksione të llojeve e kategorive të veçanta;
11. Përfaqësimin e shoqërisë në gjykimet ndaj organeve të administrimit;
12. Riorganizimin dhe prishjen e shoqërisë;
13. Miratimin e rregullave procedurale të mbledhjeve të saj;
14. Çështje të tjera të parashikuara shprehimisht nga ligji apo statuti.

Asambleja e Përgjithshme merr vendime pas shqyrtimit të dokumenteve përkatëse, së bashku me raportin e këshillit të administrimit dhe raportin e ekspertit kontabël të autorizuar.

Nëse shoqëria zotërohet nga një aksionar, të drejtat dhe detyrimet e Asamblesë së Përgjithshme ushtrohen nga aksionari i vetëm. Të gjitha vendimet e marra nga aksionari i vetëm regjistrohen në një regjistër të vendimeve, të dhënat e të cilit nuk mund të ndryshohen ose të fshihen. Duhet regjistruar në veçanti, por pa u kufizuar në to, vendimet e mëposhtme:

- a) miratimi i pasqyrave financiare vjetore dhe të raporte vetë ecurisë së veprimtarisë;
- b) shpërndarja e fitimeve vjetore dhe mbulimi i humbjeve;
- c) zmadhimi ose zvogëlimi i kapitalit;
- ç) vendimet për investime;
- d) riorganizimi dhe prishja e shoqërisë.

Vendimet e paregjistruara në regjistrimin e vendimeve janë absolutisht të pavlefshme. Shoqëria nuk mund t'i kundrejtojë pavlefshmërinë të tretit, që ka fituar të drejta në mirëbesim, përveç rastit kur shoqëria provon se i treti ka pasur dijeni për pavlefshmërinë apo në bazë të rrethanave të qarta nuk mund të mos kishte pasur dijeni për të.

Neni 17

Mënyra e thirrjes së mbledhjes së Asamblese së Përgjithshme

Asambleja e përgjithshme thirret nëpërmjet një njoftimi me shkresë ose, nëse parashikohet nga statuti, me njoftim nëpërmjet postës elektronike. Njoftimi me shkresë apo me mesazh elektronik duhet të përmbajë vendin, datën, orën e mbledhjes dhe rendin e ditës e t'u dërgohet të gjithë aksionerëve jo më vonë se 7 ditë përpara datës së parashikuar për mbledhjen e asamblesë. Kur asambleja e përgjithshme nuk është thirrur sipas pikës 1 të këtij neni, ajo mund të marrë vendime të vlefshme vetëm nëse të gjithë aksionerët janë dakord, për të marrë vendime, pavarësisht parregullsisë.

Neni 18

Mbledhjet e Asamblesë së Përgjithshme

Asambleja e Përgjithshme merr vendime të vlefshme vetëm me arritjen e kuorumit të parashikuar nga neni 144 i Ligjit.

Gjatë mbledhjes së asamblesë së përgjithshme përgatitet lista e aksionarëve të pranishëm dhe të përfaqësuesve të tyre, ku shënohen emrat dhe adresat e secilit, së bashku me numrin e aksioneve, numrin e votave, që këto aksione japin, vlerën nominale të aksioneve, si dhe llojin apo kategorinë e tyre, të zotëruara nga secili pjesëmarrës. Kjo listë u vihet në dispozicion aksionarëve dhe përfaqësuesve të tyre dhe nënshkruhet prej tyre. Asambleja e përgjithshme cakton një kryetar.

Nëse asnjë prej Administratorëve nuk dëshiron të caktohet si Kryetar i mbledhjes ose nëse asnjë prej Administratorëve nuk është i pranishëm për pesëmbëdhjetë minuta duke filluar nga ora e caktuar për fillimin e mbledhjes, aksionarët e pranishëm dhe me të drejtë vote zgjedhin njërin prej tyre si Kryetari të mbledhjes.

Administratori ose anëtari i Këshillit të Administrimit pavarësisht se nuk është aksionar, ka të drejtën e pjesëmarrjes si edhe të marrë fjalën në çdo mbledhje të Asamblesë së Përgjithshme dhe në mbledhjet e veçanta të aksionarëve, zotërues të aksioneve të klasave të ndryshme.

Neni 19

Kuorumi

Në rastin e çështjeve, që vendosen me shumicë të zakonshme, asambleja e përgjithshme mund të marrë vendime të vlefshme, vetëm nëse janë të pranishëm ose të përfaqësuar aksionarët, që zotërojnë më shumë se 30 për qind të aksioneve, me të drejtë vote. Kur asambleja duhet të vendosë për çështje, të cilat kërkojnë shumicë të kualifikuar, sipas nenit 145 të Ligjit 9901, asambleja e përgjithshme mund të marrë vendime të vlefshme, vetëm nëse aksionarët, që zotërojnë më shumë se gjysmën e numrit total të aksioneve me të drejtë vote, apo përfaqësuesit e tyre, marrin pjesë në votim personalisht ose votojnë me shkresë apo me mjete elektronike, sipas parashikimeve të nenit 142 të këtij ligji.

Nëse Asambleja e Përgjithshme nuk mund të mbledhet për shkak të mungesës së kuorumit të përmendur në pikën 1 të këtij neni, asambleja mbledhet përsëri jo më vonë se 30 ditë, me të njëjtin rend dite.

Neni 20

Marrja e vendimeve

Asambleja e përgjithshme vendos me tri të katërtat e votave të zoteruesve të kapitalit, të aksionarëve pjesëmarrës, për ndryshimin e statutit, zmadhimin ose zvogëlimin e kapitalit të regjistruar, shpërndarjen e fitimeve, riorganizimin dhe prishjen e shoqërisë. Asambleja e përgjithshme vendos me shumicën e votave të aksionerëve pjesëmarrës, për çështje të tjera të parashikuara në nenin 14 të këtij statuti si më poshtë:

- a) përcaktimi i politikave tregtare të shoqërisë;
- b) emërimin dhe shkarkimin e administratorëve;
- c) emërimin e shkarkimin i likuiduesve dhe të ekspertëve kontabël të autorizuar;
- d) përcaktimin e shpërblimeve

- e) mbikëqyrjen e zbatimit të politikave tregtare nga administratorët, përfshirë përgatitjen e pasqyrave financiare vjetore
- f) përfaqësimin e shoqërisë në gjykatë dhe në procedimet e tjera ndaj administratorëve;
- g) miratimin e rregullave procedurale të mbledhjeve të asamblesë;

Cdo ndryshim statuti duhet të depozitohet pranë QKR për të pasyruar ndryshimet në skeden e shoqërisë.

Neni 21

Këshilli Administrimit

Asambleja e Përgjithshme cakton tre ose më shumë, por jo më shumë se 21, persona fizikë si anëtarë të Këshillit të Administrimit, në pajtim me shkronjën "c", pika 2 të nenit 135 dhe pikën 2 të nenit 155 të Ligjit. Emërimet do të jenë individuale dhe në përputhje me vendimin e mbledhjes së Asamblesë së Përgjithshme të marrë me shumicë votash, i cili, nëse miratohet, sjell emërimin e personit të propozuar si anëtar të Këshillit të Administrimit. Anëtarët e Këshillit të Administrimit mund të shkarkohen nga detyra në çdo kohë nga Asambleja e Përgjithshme, pa cenuar të drejtat që burojnë nga një kontratë pune e lidhur me Shoqërinë.

Shumica e anëtarëve të Këshillit të Administrimit do të jenë të pavarur dhe nuk do të jenë Administratorë, në përputhje me parashikimet e pikës 1 dhe 4 të nenit 155 të Ligjit.

Anëtarët e Këshillit të Administrimit mund të caktojnë një person i cili dëshiron të veprojë në cilësinë e anëtarit të Këshillit të Administrimit, duke pasur parasysh se emërimi nuk përbën zmadhim të numrit të anëtarëve, të përmendur në pikën 1 të këtij neni. Anëtari i Këshillit të Administrimit i emëruar në këtë mënyrë do të jetë në detyrë deri në mbledhjen vjetore vijuese të Asamblesë së Përgjithshme.

Personat e mëposhtëm emërohen si anëtarë të parë të Këshillit të Administrimit të Shoqërisë deri në zgjedhjen e tyre nga mbledhja e parë e Asamblesë së Përgjithshme, sipas shkronjës "c", pika të nenit 135 të Ligjit

Neni 22

Kompetencat e Këshillit të Administrimit dhe Komiteteve të tij

1. Në sistemin e administrimit me dy nivele, administratorët drejtojnë shoqërinë dhe marrin vendime për mënyrën e vënies në zbatim të politikave tregtare, ndërsa këshilli mbikëqyrës, në cilësinë e organit mbikëqyrës, këqyr vënien në zbatim të këtyre politikave dhe përputhjen e tyre me ligjin dhe statutin.
2. Në përputhje me rregullin e përgjithshëm për ndarjen e kompetencave dhe të funksioneve, sipas pikës 1 të këtij neni, dispozitat e neneve 154 deri në 165 të këtij ligji gjejnë zbatim edhe për marrëdhëniet ndërmjet administratorëve dhe anëtarëve të këshillit mbikëqyrës, ku funksionet e këtij këshilli, në përputhje me nenin 167 të këtij ligji, u korrespondojnë funksioneve mbikëqyrëse të këshillit të administrimit.

1. Këshilli mbikëqyrës është përgjegjës për të gjitha funksionet e përcaktuara në pikat 1, shkronjat “b” deri në “g” e “i” dhe 2 të nenit 154 të këtij ligji.
2. Në bazë të parashikimeve të statutit, administratorët mund të emërohen dhe shkarkohen, në përputhje me pikat 1 e 2 të nenit 158 të këtij ligji, nga asambleja e përgjithshme apo nga këshilli mbikëqyrës. Së bashku me funksionet e pikave 3, 4 e 5 të nenit 158 të këtij ligji, administratorët kanë të drejtë e duhet të kryejnë edhe funksionet e përcaktuara në shkronjat “a”, “gj”, “h” e “i” të pikës 1 të nenit 154 të këtij ligji. Me përjashtim të rastit të parashikuar nga neni 13 dhe nga shkronja “e” e pikës 1 të nenit 154 të këtij ligji, veprimet e administratorëve u nënshtrohen miratimit nga këshilli mbikëqyrës vetëm nëse kjo parashikohet shprehimisht në statut.
3. Nuk mund të zgjidhen anëtarë të këshillit mbikëqyrës administratorët e shoqërisë administratorët e shoqërive të tjera të të njëjtit grup, si dhe personat e lidhur me personat e mësipërm, sipas parashikimeve të pikës 3 të nenit 13 të këtij ligji.
4. Parashikimet e neneve 155 e 157 të këtij ligji zbatohen edhe për numrin e anëtarëve, emërimin, përbërjen dhe shkarkimin e anëtarëve të këshillit mbikëqyrës, me përjashtimet vijuese:
 - a) anëtarët e këshillit nuk duhet të kryejnë funksione administrimi dhe shumica e tyre duhet të jenë të pavarur;
 - b) statuti mund të parashikojë që disa prej tyre mund të zgjidhen dhe/ose shkarkohen nga punëmarrësit e shoqërisë.
5. Nenet 160, 161 dhe 162 të këtij ligji zbatohen edhe për shpërblimin, organizimin e brendshëm dhe marrjen e vendimeve nga këshilli mbikëqyrës.
6. Anëtarët e këshillit mbikëqyrës përgjigjen për dëmet e shkaktuara nga shkelja e detyrave të tyre dhe standardit të kujdesit, të përcaktuara në pikat 1, 2 e 3 të nenit 163 të këtij ligji. Për shkeljet e kryera nga administratorët, sipas parashikimeve të pikës 4 të nenit 163 të këtij ligji, anëtarët e këshillit mbikëqyrës janë përgjegjës, kur nuk njoftojnë asambleenë e përgjithshme, edhe pse kanë dijeni për këto shkelje, apo kur nuk i kanë zbuluar ngaqë funksioni i mbikëqyrjes, sipas kërkesave të këtij ligji, nuk është kryer në mënyrë korrekte e sipas standardeve të kërkuara.

Neni 23

Mbledhjet e Këshillit të Administrimit

- 1) Mbledhjet e Këshillit të Administrimit do të mbahen të paktën dy herë në vit sipas nevojave të aktivitetit tregtar të Shoqërisë, derisa Asambleja e Përgjithshme të vendosë me shumicë të zakonshme votash mbi shpeshësinë e mbledhjeve të Këshillit të Administrimit.

2) Vendimet e Këshillit të Administrimit merren me kuorumin e përcaktuar në nenin 162 të Ligjit. Anëtarët e Këshillit të Administrimit mund të marrin pjesë në mbledhje nëpërmjet mjeteve elektronike të komunikimit përfshirë komunikimin video dhe audio konferencë. Ata mund të marrin pjesë në votime duke përdorur numrin PIN të lëshuar çdo anëtarë në momentin e emërimit.

3) Anëtarët e Këshillit të Administrimit emërojnë njërin prej tyre si Kryetar të mbledhjes, i cili mund të shkarkohet në çdo kohë nga kjo detyrë. Administratori nuk mund të emërohet si Kryetar i Këshillit të Administrimit. Kryetari do të drejtojë çdo takim të Këshillit të Administrimit në të cilin ai është i pranishëm. Në rast se Kryetari nuk dëshiron të drejtojë mbledhjen apo nuk është i pranishëm brenda pesë minutave nga orari i caktuar për mbledhjen, anëtarët e Këshillit të Administrimit mund të emërojnë njërin prej tyre si Kryetar të mbledhjes.

4) Çështjet e rendit të ditës vendosen me shumicën e votave të pjesëmarrësve. Në rast numri të barabartë votash, vota e Kryetarit do të jetë vendimtare. Të gjitha aktet e kryera nga mbledhja e anëtarëve të Këshillit të Administrimit, ose komitetet e anëtarëve të Këshillit të Administrimit, ose nga persona të cilët veprojnë si anëtarë të Këshillit të Administrimit, pavarësisht nëse bëhet e ditur më pas se emërimi i anëtarit të Këshillit të Administrimit ka pasur mangësi ose këta anëtarë janë skualifikuar nga mbajtja e kësaj detyre, ose nuk kishin të drejtë të votonin, do të konsiderohen të vlefshme njëllë sikur këta persona të ishin emëruar rregullisht dhe të ishin cilësuar e të vazhdonin detyrën si anëtarë të Këshillit të Administrimit dhe të kishin të drejtë të votonin në mbledhje.

5) Vendimi me shkrim i nënshkruar nga të gjithë anëtarët e Këshillit të Administrimit që kanë të drejtë të njoftohen për mbledhjen e Këshillit të Administrimit ose të komitetit të anëtarëve të Këshillit të Administrimit do të konsiderohet si i vlefshëm dhe i efektshëm njëllë si të ishte miratuar në mbledhjen e Këshillit të Administrimit ose në komitetin e anëtarëve të Këshillit të Administrimit, të thirrur dhe mbledhur rregullisht.

Neni 24

Procesverbali i Mbledhjes së anëtarëve të Këshillit të Administrimit

Anëtarët e Këshillit të Administrimit do të mundësojnë mbajtjen e procesverbaleve të mbledhjeve në libra të posaçëm për:

1. të gjithë emërimet e kryera nga anëtarët e Këshillit të Administrimit; dhe
2. të gjithë mbledhjet e Asamblesë së Përgjithshme, mbledhjet e zotëruesve së aksioneve të klasave të ndryshme, dhe mbledhjet e Këshillit të Administrimit dhe komiteteve të Këshillit të Administrimit, përfshirë edhe emrat e anëtarëve të Këshillit të Administrimit të pranishëm në këto mbledhje.

Neni 25

Shkarkimi i anëtarëve të Këshillit të Administrimit

Detyra e anëtarit të Këshillit të Administrimit përfundon në rast se:

personi nuk është më anëtar i Këshillit të Administrimit në bazë të dispozitave të Ligjit përfshirë nenin 157 dhe pikën 7 të nenit 158.

personi ndodhet në gjendje paaftësie paguese;

personi vuan ose mund të vuajë nga çrregullime mendore;

personi jep dorëheqjen nga detyra duke njoftuar shoqërinë, ose

ka munguar për më shumë se gjashtë muaj radhazi pa lejen e anëtarëve të tjerë të Këshillit Administrimit në mbledhjet e këtij këshilli të mbajtura gjatë kësaj periudhe dhe Këshilli i Administrimit vendos ta shkarkojë nga detyra.

Neni 26

Kompetencat e Administratorëve

Administratorët kanë të drejtë e detyrohen të:

a) kryejnë të gjitha veprimet e administrimit të veprimtarisë tregtare të shoqërisë, duke zbatuar politikën tregtare, të vendosura nga asambleja e përgjithshme;

b) përfaqësojnë shoqërinë tregtare;

c) kujdesen për mbajtjen e saktë e të rregullt të dokumenteve dhe të librave kontabël të shoqërisë;

ç) përgatisin dhe nënshkruajnë bilancin vjetor, bilancin e konsoliduar dhe raportin e ecurisë së veprimtarisë dhe, së bashku me propozimet për shpërndarjen e fitimeve, i paraqesin këto dokumente përpara asamblesë së përgjithshme për miratim;

d) krijojnë një sistem paralajmërimi në kohën e duhur për rrethanat, që kërcënojnë mbarëvajtjen e veprimtarisë dhe ekzistencën e shoqërisë;

dh) kryejnë regjistrimet dhe dërgojnë të dhënat e detyrueshme të shoqërisë, siç parashikohet në ligjin për Qendrën Kombëtare të Regjistrimit;

e) raportojnë përpara asamblesë së përgjithshme në lidhje me zbatimin e politikave tregtare dhe me realizimin e veprimeve të posaçme me rëndësi të veçantë për veprimtarinë e shoqërisë tregtare;

kryejnë detyra të tjera të përcaktuara në ligj dhe në statut.

Administratoret janë të detyruar të thërrasin Asamblenë e Përgjithshme, në rastet kur:

-sipas bilancit vjetor apo raporteve të ndërmjetme financiare, rezultojnë ose ekziston rreziku që aktivet e shoqërisë nuk i mbulojnë detyrimet e kërkueshme brenda 3 muajve në vazhdim.

-shoqëria propozon të shesë apo të disponojë në mënyrë tjetër aktive, të cilat kanë një vlerë më të lartë se 5 për qind të asetëve të shoqërisë, që rezultojnë në pasqyrat e fundit financiare të certifikuara.

-shoqëria, brenda 2 viteve të para pas regjistrimit të saj, propozon të blejë nga një ortak pasuri, që kanë vlerë më të lartë se 5 për qind të asetëve të shoqërisë, që rezultojnë në pasqyrat e fundit financiare të certifikuara.

Nëse asambleja e përgjithshme emëron më shumë se një administrator, ata e administrojnë bashkërisht shoqërinë.

Asambleja e përgjithshme mund të shkarkojë administratorin në çdo kohë me shumicë të zakonshme. Padiet, që lidhen me shpërblimin e administratorit, në bazë të marrëdhënieve kontraktore me shoqërinë, rregullohen sipas dispozitave ligjore në fuqi.

Neni 27

Përgjegjësitë e Administratorit.

Përveç sa është parashikuar në dispozitat e përgjithshme të detyrimit të besnikërisë, sipas neneve 14, 15, 17 e 18 të ligjit "Per Tregtarët dhe Shoqëritë Tregtare", administratori detyrohet:

- a) të kryejë detyrat e tij të përcaktuara në ligj dhe në statut në mirëbesim e në interesin më të mirë të shoqërisë në tërësi, duke i kushtuar vëmendje të veçantë ndikimit të veprimtarisë së shoqërisë në mjedis;
- b) të ushtrojë kompetencat që i njihen në ligj dhe në statut vetëm për arritjen e qëllimeve të përcaktuara në këto dispozita;
- c) të vlerësojë me përgjegjësi çështjet, për të cilat merret vendim;
- ç) të parandalojë dhe mënjanë rastet e konfliktit, prezent apo të mundshëm, të interesave personalë me ata të shoqërisë;
- d) të ushtrojë detyrat e tij me profesionalizmin dhe kujdesin e nevojshëm.

2. Administratori, gjatë kryerjes së detyrave të tij, përgjigjen ndaj shoqërisë për çdo veprim ose mosveprim, që lidhet në mënyrë të arsyeshme me qëllimet e shoqërisë tregtare, me përjashtim të rasteve kur, në bazë të hetimit dhe vlerësimit të informacioneve përkatëse, veprimi ose mosveprimi është kryer në mirëbesim.

3. Nëse administratori vepron në kundërshtim me detyrat dhe shkel standardet profesionale, sipas pikave 1 e 2 të këtij neni, është i detyruar t'i dëmshpërblejë shoqërisë dëmet, që rrjedhin nga kryerja e shkeljes, si dhe t'i kalojë çdo fitim personal që ata apo personat e lidhur me ta kanë realizuar nga këto veprime të parregullta. Administratori ka barrën e provës për të vërtetuar kryerjen e detyrave të tyre në mënyrë të rregullt e sipas standardeve të kërkuara. Kur shkelja është kryer nga më shumë se një administrator, ata përgjigjen ndaj shoqërisë në mënyrë solidare.

Në mënyrë të veçantë, por pa u kufizuar në to, administratori është i detyruar t'i dëmshpërblejë shoqërisë dëmet e shkaktuara, nëse, në kundërshtim me dispozitat e ligjit Per Tregtarët dhe Shoqëritë Tregtare, kryen veprimet e mëposhtme:

- a) u kthen aksionerëve kontributet;
- b) u paguan aksionerëve interesa apo dividendë;
- c) u shpërndan aktivet shoqërisë;
- ç) lejon që shoqëria të vazhdojë veprimtarinë tregtare, kur, në bazë të gjendjes financiare, duhej të parashikohej që shoqëria nuk do të kishte aftësi pagueuse për të shlyer detyrimet;
- d) jep kredi.

Përveç padisë për shlyerjen e dëmit që i ngarkohet personalisht administratorit, aksionerët individualisht ose se bashku, kanë të drejtë të ngrenë padi penale kundër administratorit. Paditësit kanë të drejtë të ndjekin në rrugë ligjore shlyerjen e plotë të dëmit që i është shkaktuar shoqërisë, përfshirë edhe dëmshpërblimin financiar, nëse është e nevojshme. Asnjë vendim i asamblesë nuk mund të ndalojë ngritjen e kërkesë padisë kundër administratorit për gabimet e kryera prej tij gjatë ushtrimit të detyrës.

Neni 28

Shkarkimi i Administratorëve

Detyra e Administratorit përfundon në rast se:

1. Personi nuk është më Administrator në bazë të dispozitave të Ligjit përfshirë shkarkimin nga Asambleja e Përgjithshme në pajtim me pikën 2 të nenit 167, dhe shkronjën "c" të pikës 2 të nenit 135 të Ligjit;
2. Personi gjendet në paaftësi pagueuse

3. Personi vuan ose mund të vuaj nga çrregullime mendore
4. Personi jep dorëheqjen nga detyra duke njoftuar shoqërinë ose ka munguar më shumë së 6 muaj rradhazi pa lejen e Këshillit të Administrimit në mbledhjet e Administratorëve të mbajtura gjatë kësaj periudhe
5. Asambleja e Përgjithshme, me propozim të Këshillit Mbikqyrës, vendos ta shkarkoj nga detyra.

Neni 29 Administrimi

Administrator i shoqërisë është, emëruar në këtë detyrë për një afat 5 vjecar me të drejtë ripëritje. Emërimi i administratorëve prodhon efekt pas rregjistrimit në Qendrën Kombëtare të Regjistrimit. Administratori emerohet dhe shkarkohet me vendim nga keshilli mbikqyres.

Neni 30 Këshilli Mbikqyrës

Anëtarë të këshillit mbikqyrës emërohen në këtë detyrë nga Asambleja e Përgjithshme për një afat 3 vjecar me të drejtë ripertëritje.

Eksperti Kontabël emërohet çdo vit nga Asambleja e Përgjithshme.

KREU IV DIVIDENTËT DHE KALIMI I FITIMEVE NË KAPITALIN THEMELTAR

Neni 31

Dividendët

1) Në përputhje me dispozitat e Ligjit, shoqëria me shumicë të zakonshme të votave së Asamblesë së Përgjithshme mund të deklarojë dividendët në përputhje me të drejtat përkatëse të aksionarëve.

2) Me përjashtim të rasteve kur parashikohet ndryshe nga të drejtat që lidhen me aksionet, të gjithë dividendët deklarohen dhe paguhen në përputhje me shumatat e paguara për aksionet për të cilët paguhet dividendi. Të gjithë dividendët pjesëtohen dhe paguhen në përpjesëtim të drejtë me shumatat e paguara për aksionet, pjesës ose pjesëve të periudhës për të cilën paguhet dividendi; në rast se aksioni emetohet me kushtin e përfitimit të dividendit nga një datë e caktuar, dividendi do të paguhet në përputhje me këtë kusht.

3) Asnjë dividend ose pagesë në para që lidhet me një aksion nuk prodhon interesa kundrejt shoqërisë nëse një gjë e tillë nuk parashikohet në të drejtat e aksionit.

4) Çdo dividend që nuk është kërkuar të paguhet brenda dymbëdhjetë vjetëve nga data maturimit, në rast se vendoset nga Asambleja e Përgjithshme, do të përfitohet nga shoqëria e cila nuk do të jetë më e detyruar që ta paguajë atë.

Neni 32

Kalimi i Fitimeve në Kapitalin Themeltar

Administratorët, pas vendimit të marrë nga Asambleja e Përgjithshme me shumicë të kualifikuar votash sipas kuorumit të përcaktuar nga neni 145 i Ligjit, mund të vendosë të kalojë në kapitalin themeltar të Shoqërisë fitimet e pashpërndara të cilat nuk do të përdoren për të paguar dividendë preferencialë apo shuma të tjera të parashikuara për rezerva ligjore ose kapital.

KREU V

VITI FINANCIAR-ESKPERTËT

Neni 33

Viti Financiar

Viti financiar i Shoqërisë fillon nga data e regjistrimit të shoqërisë në QKB dhe mbyllet me 31 Dhjetor të po atij viti.

Neni 34

Ekspertët

Eksperti ka për detyrë që të kontrollojë të gjithë dokumentacionin kontabël të veprimtarisë ekonomike tregtare të shoqërisë, atë gjithë vjetor dhe atë në lidhje me kontrollet periodike të

ushtruara prej tij per rastet kur ai është ngarkuar dhe ka kryer një gjë të tille i ngarkuar nga ana e aksionerëve.

Ne perfundim të kontrollit eksperti kontabël i autorizuar përgatit raportin me shkrim për nxjerrjen e rezultatit të bilancit financiar vjetor si dhe per ate per kontrollet periodike të ushtruara, të cilat është i detyruar qe tia paraqesë e dorëzojë në kohë ortakëve per ti shqyrtuar e miratuar mbi bazën e të drejtes vendimore qe ka.

KREU V PRRISHJA DHE LIKUJDIMI

Neni 35 Prishja dhe Likuidimi

1. Shoqëria aksionare priset:

- a) me vendim të asamblesë së përgjithshme;
- b) me hapjen e procedurave të falimentimit;
- c) nëse nuk ka kryer veprimtari tregtare për dy vjet dhe nuk është njoftuar pezullimi i veprimtarisë, në përputhje me pikën 3 të nenit 43 të ligjit nr. 9723, datë 3.5.2007 “Për Qendrën Kombëtare të Regjistrimit”;
- ç) me vendim gjykate;
- d) për arsye të tjera të parashikuara në statut.

Në rast të likuidimit të Shoqërisë, likuiduesi, në përputhje me Ligjin dhe me vendimin e posaçëm të Asamblesë së Përgjithshme të marrë me shumicë të kualifikuar, mund të shpërndajë në dobi të aksionarëve të gjithë ose një pjesë të vlerës së pasurive të Shoqërisë dhe për këtë qëllim, mund të vlerësojë çdo pasuri dhe të përcaktojë mënyrën e shpërndarjes midis aksionarëve ose atyre që zotërojnë aksione të klasave të ndryshme të Shoqërisë

Neni 36
Baza Ligjore

Shoqeria do te zhvilloje aktivitetin e tij ne përputhje të plotë me këtë statut dhe dispozitat e legjislacionit shqiptar.

Per sa nuk parashikohet në këtë statut, do të zbatohen dispozitat e ligjit "Per tregtarët dhe shoqëritë tregtare", Ligji Nr. 64/2012 "Për Peshkimin" Neni 58, 59, 60, VKM Nr. 464, datë 03.07.2019, "Për procedurën për shitje e produkteve të peshkimit", Kodit Civil dhe çfaredo ligji tjetër specifik ne Republikën e Shqiperise.

Neni 37
Mosmarrëveshjet

Per mosmarrëveshjet qe mund të lindin në lidhje me zbatimin apo interpretimin e këtij statuti, si dhe për çdo mosmarrëveshje qe mund të lindë midis Shoqerise dhe të tretëve, do të jetë kompetente Gjykata Shqiptare.

Neni 38
Dispozita perfundimtare

Ky statut u redaktua ne 2 kopje në gjuhën shqipe, me përmbajtje dhe vlere të njejta juridike.
Akti i mësipërm pasi miratohet ne parim dhe nen për nen nga aksionari themelues i shoqërisë tregtare

AKSIONARI I VETËM

Bashkia Vlorë



D. Demin